

金碧五相類參同契序

陰 長 生 護 似五

參者離也同者通也契者合也八十一章儻有學人欲傳於妙道修真之門戶先聖所傳天地陰陽造化玄妙之機須化得三人同心志慕意性契合別無差互然後乃掛十方繒絲之衣靜身除亂思弟子掃五方之地可以方丈畫壇三層之中安香爐虛心焚香祝告三清四面卓刀八方懸鏡學人稱弟子手捧千兩黃金跪膝乃發弘願盟說誓言方可傳之仙經與理存心志慕修養鉛汞龍虎之機但窮此門必達天仙之徑路若逢賊盜薄徒浮游亂想之輩不可傳之

此是仙機不可泄漏不擇人傳沈於水劫如遇好士孝父母重神明重天地重賢人信好事志人方與度之亂傳者七祖受殃夫大道是天地之機陰陽之祖造化之本

金碧五相類參同契卷上

陰 長 生 註

叙說章第一

昔說魏君參同契參者離也同者通也與諸君子書丹經並此相通其機與識認根元契者上合天仙之訣下合陰陽造化變轉謂之上契合也其中真話長生理其經解仙機明恍惚冥冥杳杳五行真正之奧旨謂之曰真話長生之理也陰陽造化本根元陰陽者從黑生白是水之數一水之生金數之三水者謂之離生於坤坤為地地為陰陰為女女為母母從坤生其炁是謂坤也金在於西北屬乾為天為陽為男為父生於坎此是陰陽造化本根源故經云離宮有象藏真水坎戶含華隱正金及以乾生三男坤生三女通變為八遞相生養共成八八之數又象化而為陰陽之大小數是足也

莫問他人但問己

凡以學道修真並不離其身悟之仙聖其義玄以成真是謂問己夫以學人不曉丹經子書多生迷亂不問自己却於外覓求真何日得達天經與道殊絕更求五金八石却燒煉大藥那能燒煉得成就也朱砂黑錫與雄黃礬內燒煉成二炁朱砂者非世上朱砂水銀非世人水銀黑錫者是礦中燒出之類是其真鉛鉛中自有燒煉自有白銀聖人將朱砂黑錫入在礬鼎之中用雄黃相制乃燒成二炁丹雄黃者非世間雄黃其藥出在武都山水化之中得此雄黃方可燒得大藥成就說朱砂者是南宮而產在丙丁之中黑錫者是北方而生在於壬癸之中雄黃者是中宮而長在戊己之內將此三件藥都在鼎中燒成二炁丹方乃成遂乃多生變化仙經云藥藥元無藥鼎元無鼎為復四象成爲復五行作藥及鼎不離於身莫向外求若向外求去仙遠也